

TEZAU LITURGIC

8 IULIE

ACATISTUL SF. CUVIOS PROCOPIE DE LA USTIUJ



MOSCOVA, 2000



Акафист

святому блаженному

Прокопию Устюжскому

Кондак 1

Избранный и дивный в житии и чудесех
угодниче Божий, святой блаженный Прокопие,
песнями духовными любовью восхваляем тя,
небеснаго заступника нашего и молим ти ся
прилежно: яко имеай дерзновение ко Господу,
молитвами твоими от всяких нас бед свободдай,
да зовем ти:

Радуйся, святой блаженный Прокопие,
великий и преславный чудотворче.

Икос 1

Ангел во плоти был еси, святе Прокопие, егда
яко юрод Христа ради на земли являлся еси, да
от людей святость жития твоего утайши,
безчестием же всяческим вечную славу на
Небеси улучити сподобишася. Сего ради
ублажаем тя сими хвалебными глаголы:

Радуйся, от земли Отечества твоего спасения ради в землю Российскую смотрением Божиим приведенный.

Радуйся, от купли житейския к купле духовной промыслием Его обращенный.

Радуйся, в Велицем Новеграде светом веры православныя озаренный.

Радуйся, заблуждение еретического инославия далече от себе отринувый.

Радуйся, во обители Хутынстей благочестию христианскому добре навыкий.

Радуйся, наставлением старца духовнаго в православии крепко утвердивыйся.

Радуйся, богатство твое земное храмом Божиим и нищым иждивый.

Радуйся, в вольней нищете пребывати изволивый.

Радуйся, в Великий Устюг яко нищ и странен пришедый.

Радуйся, юродственное житие в нем проходивый.

Радуйся, от неразумных посмеваем, поругаем и биен яко юрод бывый.

Радуйся, терпением велиим и смирением совершенным душу твою к подвигом уготовавый.

Радуйся, святой блаженный Прокопие, великий и преславный чудотворче.

Кондак 2

Видев благолепие храмов Божиих в велицем Новеграде, и красоту службы церковныя, уязвился еси, Прокопие блаженне, любовью к православней вере Христовой, и сию не познати токмо, но и исполнити восхотев, в обитель преподобнаго Варлаама Хутынскаго пришел еси, и от игумена оныя наставлен быв, добре познал еси догматы святыя веры, и верен ея исповедник явился еси, зовый в Троице единому Богу: Аллилуиа.

Икос 2

Разум просвещен от Бога имый, добре суету и тленность сокровищ мира сего уразумел еси, Прокопие богомудре, и куплю земную оставль, вся стяжания твоя храмом Божиим, обителем иноческим и нищым расточил еси, сам нищ быв, да богатому в милости Христу Богу послужиши

невозбранне, темже слышиши от нас сия похвалы:

Радуйся, куплю временную на вечную мудре пременивый.

Радуйся, Христа ради нищету вольную избравый.

Радуйся, руками нищих на небо сокровища твоя предпославый.

Радуйся, иго Христова радостно душею на ся восприявый.

Радуйся, алкавый и жаждавый на земли, да пищи нетленные и пития духовнаго насладиши на небеси.

Радуйся, юродствовавый пред человеки, да ликовствуеши со ангелы.

Радуйся, всякое упокоение плотское возненавидевый.

Радуйся, в раздранной ветсей ризе ходивый.

Радуйся, плечи твоя на ударения вдавый.

Радуйся, ланиты твоя от заушений неотвративый.

Радуйся, оскорбления и оплевания кротце и незлобиве терпевый.

Радуйся, за оскорблявших тя Богу
моливыйся.

Радуйся, святой блаженный Прокопие,
великий и преславный чудотворче.

Кондак 3

Силою Господа Сил укрепляемь, мраз и зной
добльственне претерпел еси, Прокопие
блаженне, полунаг, во единой ризе лето и зиму
обходяй стогны великаго Устюга, не имый
места, где главу приклонити, токмо в притворе
соборнаго Пресвятыя Богородицы храма
нищетне пребываяй, идеже присно пел Христу
Богу: Аллилуиа.

Икос 3

Имел еси, святче Божий, велие терпение и
незлобие, памятуя бо распеньшагося нас ради
Христа, о распинателех своих ко Отцу
молившася, и ты о оскорблявших и бивших тя
тепле молил еси, яко о благодетелех твоих.
Темже настави и нас не памятозлобствоватьи, но
в кротости духа вопити к тебе таковая:

Радуйся, словеса апостола Павла: «мы убо буи
Христа ради», дела твоими известивый.

Радуйся, первый в Российской стране
юродства Христа ради подвиг на ся приявый.

Радуйся, великим праведником Симеону и
Андрею Христа ради юродивым, верно
подражавый.

Радуйся, подобно им поругания и биения
претерпевый.

Радуйся, на высоту безстрастия восшедый.

Радуйся, во глубину смирения приныкий.

Радуйся, кроткий Христов последователю.

Радуйся, незлобивый о оскорблявших тя
предстателю.

Радуйся, ангелонравный человекче.

Радуйся, зримый в мире обаче от мира
сокровенный подвижникче.

Радуйся, Пресвятая Богородицы избранный
слуго.

Радуйся, милостей и щедрот Ея усердный
прославителю.

Радуйся, святой блаженный Прокопие,
великий и преславный чудотворче.

Кондак 4

Буря гнева Божия найде на град Устюг, гром и молния, и огненный дождь с небесе посланы быша во истребление граду, грехи своими Господа прогневавшему: но ты, святе Прокопие, явился еси умиловитель гнева Божия, подвизая ближния твоя к покаянию, слезам и молитве, да сими преклонят на милость прогневаннаго Владыку небесе и земли, Емуже в молитвах усердне взывал еси: Аллилуиа.

Икос 4

Слышавше гром с небесе и видевшие молнию и облаки огневидныя, дождь огнен на град их извести хотящия, жители града, в страсе велием, притекоша в соборный храм Богоматере и тамо обретоша тя, святе Прокопие, со слезами молящяся пред иконою честнаго Ея Благовещения о спасении града матерними Ея ко Господу молитвами. Темже о спасенных предстательством твоим достоит звати тебе:

Радуйся, благоприятный ко Господу молитвенниче.

Радуйся, слезами молитвенными огонь гнева Божия угасивый.

Радуйся, прогневаннаго Создателя всяческих на милость к людем согрешившым преклонивый.

Радуйся, руки твоя святыя ко Господу на умоление со упованием простиравый.

Радуйся, Пресвятую Владычицу Богородицу в помощницу молитвам твоим призывавый.

Радуйся, матерним Ея предстательством ко Христу Богу, тучи гнева Небеснаго отвративый.

Радуйся, град согрешивший к покаянию призывавый.

Радуйся, от гибели огненныя дивно его избавивый.

Радуйся, праведниче, егоже ради помилова Господь многия грешники.

Радуйся, посредниче между Богом и согрешившими человеки.

Радуйся, покаяния проповедниче немолчный.

Радуйся, благочестия наставниче нелицеприятный.

Радуйся, святой блаженный Прокопие, великий и преславный чудотворче.

Кондак 5

Боготочный источник мира благоуханна
источися от святыя иконы Благовещения
Пресвятыя Богородицы, пред неюже со слезами
молился еси, блаженне Прокопие, в соборном
храме со всеми людьми: и се абие тучи огненныя
от града Устюга уклонишася в пустынная места,
и тамо камень огненное одождиша, не
вредивше никогоже от людей. Поминающе убо
веле сие милосердия Божия чудо, со
благоговением зовем чудес Творцу Богу:
Аллилуиа.

Икос 5

Видевше людие Устюжстии спасение свое от
гибели огненныя, и источник мира, текущий
чудесне от иконы Богоматере, в радостный
трепет приидоша, и благодариша Бога и
Пречистую Богородицу со слезами. Мы же тебе,
святе Прокопие, яко виновника таковой
милости Божией и усерднаго о них
молитвенника, ублажаем звании сими:

Радуйся, во смирении твоём высокая
дарования небесная стяжавый.

Радуйся, нищетою вольною богатство чудес
свыше приявый.

Радуйся, яко Моисей о людех града Устюга со
дерзновением пред Богом ходатайствовавый.

Радуйся, яко Иеремия с плачем велием люди
Устюжстии к покаянию призывавый.

Радуйся, слез твоих теченьми, течение мира
благодатнаго от иконы Богоматере испросивый.

Радуйся, яже из глубины въздыханьми,
дыхание туч огненных безвредно людем
сотворивый.

Радуйся, страхом гнева Божия люди
ненаказанныя уцеломудривый.

Радуйся, яко Иона ниневитяном, людем
Устюжским во спасение послуживый.

Радуйся, яко камение в пустыни, с небесе
спадшее, до днесь молитв твоих действо
свидетельствует.

Радуйся, яко камение сие, от рода в род,
велие заступление твое граду Устюгу ясно
знаменует.

Радуйся, яко древним пророком Божиим
силою чудес уподобился еси.

Радуйся, яко любовию к Богу и ближним новозаветным праведником поревновал еси.

Радуйся, святой блаженный Прокопие, великий и преславный чудотворче.

Кондак 6

Проповедует присно Великий Устюг великое заступление твое, Прокопие богоблаженне, и светло красуется, стяжав тя помощника и покровителя себе. Молим убо тя, святе, не лиши и нас грешных твоея небесныя помощи и покрова молитв твоих: тебе бо благонадежно сами себе и друг друга вверяем, и во умилении глубоцем воспеваем прославльшему тя Царю Славы, Христу Богу: Аллилуиа.

Икос 6

Возсиял еси во граде Устюзе предивным житием твоим, преподобне Прокопие, яко звезда богосветлая, и лучами чудес твоих всю страну Российскую благодатне озаряеши: тако прослави тя во смирении твоём Христос Бог, прославляющыя Его прославляй, не на небеси токмо, но и на земли, иже и нас научи вопити тебе сице:

Радуйся, добрый ревнителю подвигов духовных.

Радуйся, юродством Христа ради от человек сия утаевавый.

Радуйся, свеще, тму нечестия просвещающая.

Радуйся, лампадо, елей милости Божия изливающая.

Радуйся, правило веры в знамениих и чудесех являемое.

Радуйся, образе кротости, любовию о Христе немощи человеческия покрывающая.

Радуйся, надеждою Царствия Божия злострадания земная в сладость себе претворивый.

Радуйся, в любви божественней, яже есть союз совершенства, благодатию Божией утвержденный.

Радуйся, дары Святаго Духа обогащенный.

Радуйся, терпеливый в скорбех.

Радуйся, благодушествуй в поношениих.

Радуйся, святой блаженный Прокопие, великий и преславный чудотворче.

Кондак 7

Хотение едино имел еси, святе Прокопие, да утаиши от человек богоугодное житие твое и подвиги духовныя, чесо ради присно юродствовал еси во дни на стогнах града Устюга, посмеяния, оскорбления и заушения приемляй от человек неразумных, о юродстве твоём глумившихся, нощи же во бдениих и молитвах в притворе соборнаго храма Богоматере проводил еси, присно воспевая рождшемуся от Нея Спасу мира: Аллилуиа.

Икос 7

Новаго воистинну пророка, и дивнаго прозорливца яви тя Господь людем устюжским: мнози бо благоговейнии людие, познавше богоугодное и праведное житие твое, и в юродстве твоём высокую мудрость духовную уразумевше, послушаху словес твоих, яко словес великаго угодника Божия, емуже достоин пети таковая:

Радуйся, провидче, образы многими грядущая юродственне предвозвещавый.

Радуйся, сими благоплодие и неплодие земли на пользу людем предзнаменовавый.

Радуйся, прозорливче, сокровенная сердец человеческих духом Божиим прозиравай.

Радуйся, ко вразумлению слышащих сия им покаяния ради открывавый.

Радуйся, тайных беззаконий обличителю.

Радуйся, грозный нераскаянных грешников карателю.

Радуйся, небоязненный сильным мира суда Божия провозвестниче.

Радуйся, обидимых и гонимых заступниче.

Радуйся, в юной отроковице будущую мать великаго святителя и просветителя Перми Стефана прозревый.

Радуйся, сие воистинну неложно о ней предсказавый.

Радуйся, о плавающих в ладях по реце Сухоне усердныя молитвы приносивый.

Радуйся, обуреваемым волнами плавание благопоспешно молитвами твоими устройвый.

Радуйся, святой блаженный Прокопие, великий и преславный чудотворче.

Кондак 8

Странен и юрод Христа ради быв не обреташе блаженный Прокопие единою, зиме лютей сущей, крова к согреянию отмерзшия плоти своея: тогда Человеколюбец Господь посла ангела своего с ветвию цветов райских, еюже прикоснувся к лицу блаженнаго, теплоту живительную вдохну в хладное тело его, и тако согрет быв, и ожив радуяся, возопи ангелов и человеков Владыце Богу: Аллилуиа.

Икос 8

Весь Богу прилепился еси любовью, Прокопие достоблаженне: темже и Бог бе с тобою, по неложному обетованию своему. Сего ради, любовь чтуще тя, верный угодниче Христов, по долгу ублажаем тя пении сими:

Радуйся, ангелов радование.

Радуйся, человеков удивление.

Радуйся, мужу желаний духовных.

Радуйся, собеседниче сил безплотных.

Радуйся, вравие райское от ангела приявый.

Радуйся, благоуханием онаго оживленный.

Радуйся, от мраза лютаго неврежденный.

Радуйся, теплотою благодатною согретый.

Радуйся, благий сердцем.

Радуйся, кроткий нравом.

Радуйся, все упование твое на Господа
ВОЗЛОЖИВЫЙ.

Радуйся, во уповании твоём непосрамленный.

Радуйся, святой блаженный Прокопие,
великий и преславный чудотворче.

Кондак 9

Ангели Небеснии дивляхуся видяще твое
многострадальное житие, Прокопие преподобне,
и сам Владыка и Царь ангелов Христос Господь
осени тя благодатию своею божественною, еяже
знамением быша чудеса, тобою совершенныя во
славу имени Его Святаго, о нихже людие
устюжстии прославляху прославльшаго тя Бога,
вопиюще Ему: Аллилуиа.

Икос 9

Ветии человечестии не могут постигнути
глубину премудрости Божией, яко не премудрых
мира сего, но буих о Христе, избирает Бог в
жилище благодати своея, сия тако о тебе
сбывшаяся видяще, святе Прокопие, яко велия

таинника Пресвятыя Троицы ты почитаем, и
любовию от сердца возглашаем ти
благохваления сицевая:

Радуйся, обетований евангелских наследниче.

Радуйся, преданий апостольских
последователю.

Радуйся, мудрый странниче, иский Горняго
Отечества.

Радуйся, Божий избранниче, восшедый на
высоту совершенства духовнаго.

Радуйся, буйством о Христе премудрость
небесную стяжавый.

Радуйся, лишении временными довольство
вечное искупивый.

Радуйся, яко злато в горниле огнем скорбей
искушенный.

Радуйся, яко сребро чистое пред очами
Божиими явльшийся.

Радуйся, в мужестве непоколебимый.

Радуйся, в терпении благоискусный.

Радуйся, кротостию злобу побеждавый.

Радуйся, во единем Бозе утешение
обретавый.

Радуйся, святой блаженный Прокопие, великий и преславный чудотворче.

Кондак 10

Спасения надежду стяжав и от ангела Божия о кончине своей извещен быв, почи блаженный о Господе сном смертным пред враты обители Архангельския в Устюзе, сотаинником и другом его о Христе, преподобным Киприаном созданныя, душею же своею святою воспари ко обителем небесным, идеже ныне со ангельскими лики выну поет Богу: Аллилуиа.

Икос 10

Царя Небеснаго Христа верный раб был еси, Прокопие святе, от Негоже чудесы многими прославлен еси, яко и самый гроб твой, источник исцелений показася, к немуже недужнии с верою притекающе, здравие получаху, и тя, яко милостиваго и безмезднаго целителя прославляху, зовуще и глаголюще:

Радуйся, святче Божий, со святыми почиваяй и о грешных Бога умоляяй.

Радуйся, угодниче Христов, дары исцелений болящым подаваяй.

Радуйся, кончиною святою преселившийся от земли на небо.

Радуйся, от горних высот на землю к просящим твоего заступления милостивно приникаяй.

Радуйся, расслабленных благодатный укрепителю.

Радуйся, бесноватых от насилия диавола свободителю.

Радуйся, покрытых язвами чудесне врачевай.

Радуйся, тяжкими недуги одержимых и в нечаянии бывших паки в здравие приводивый.

Радуйся, ближним и дальним равно милостивно благотворивый.

Радуйся, гроб твой всем притекающим к нему верным лечебницу недугов показавый.

Радуйся, града Устюга неотступный хранителю.

Радуйся, чтущих святую память твою небесный покровителю.

Радуйся, святой блаженный Прокопие, великий и преславный чудотворче.

Кондак 11

Пение молебное совершая у гроба твоего, болящий Григорий, огневицею зельною обдержим бысть, егда точию коснувся целебней раце твоей, чудотворче святой Прокопие, абие здрав бысть, ин же боляй, болярин Владимир, егоже все тело язвами покровено бысть, единым шествием святых иконы твоея исцеление совершенное прият, темже оба прослависта Бога, Дивнаго во святых своих, благодарне поюще Ему: Аллилуиа.

Икос 11

Светлостию чудес твоих, угодниче Божий, яко светило путеводное сияеши всем, хотящим благочестно о Христе жити, не потерпел бо еси мертвецу некоему, нечестиво жившу, близ гроба твоего погребену быти, но знамением неким дивным удалил еси от себе, да научатся вси бегати скверн греха. Сего ради обиталище тя Духа Божия быти уведевше, зовем ти таковая:

Радуйся, веры Христовы плоды благодатныя в себе явивый.

Радуйся, яко солнце в добродетелех просиявый.

Радуйся, в крестоношении преуспевый.

Радуйся, все житие твое во угождение Богу постивый.

Радуйся, во благоухании святыни опочивый.

Радуйся, от гроба твоего жизнь нетления известивый.

Радуйся, яко рака твоя честная источник исцелений недугующим показася.

Радуйся, яко вси приходящи к ней с верою, благодатию освящени бывають.

Радуйся, врачу всем подающий многоразличныя исцеления.

Радуйся, страны Российския духовное украшение.

Радуйся, града Устюга благонадежное утверждение.

Радуйся, от бед и скорбей и смертоносных недугов скорое избавление.

Радуйся, святой блаженный Прокопие, великий и преславный чудотворче.

Кондак 12

Благодать Божию свыше испроси нам великий угодниче Божий, блаженный и праведный Прокопие, и буди о нас усердный молитвенник ко Господу, да утвердившееся в заповедех Господних, достигнем спасения вечнаго, и тако и на земли живых и в Царствии Небеснем выну поем Богу: Аллилуиа.

Икос 12

Поем дивное житие твое и преславная чудотворения твоя, святой праведный Прокопие, молитвенно почитаем святую память твою, яко от обителей горних к нам милостиво призираеши, и благодатно посещаеши, ущедряя дары духовными ублажающих тя сими похвалами:

Радуйся, Пресвятая Троицы благодатию освещенный.

Радуйся, Пресвятая Богородицы покровом осененный.

Радуйся, алавастрe мира целебнаго.

Радуйся, сокровищнице даров Божия благодати.

Радуйся, благосердый предстателю, болящаго отрока милостивно исцеливый.

Радуйся, скорый помощниче, жену некую от плена агарянского свободивый.

Радуйся, крепкий к Богу ходатаю, пресвитера умиравшаго от смерти к жизни возвративый.

Радуйся, недугов целителю, немаго купно же и расслабленнаго здрава возставивый.

Радуйся, град твой Устюг от всякаго зла молитвами твоими избавляяй.

Радуйся, всем, имя твое молитвенно призывающим, на помощь притекаяй.

Радуйся, недугов душевных и телесных благодатный врачевателю.

Радуйся, благ временных и вечных нам усердный от Господа испросителю.

Радуйся, святой блаженный Прокопие, великий и преславный чудотворче.

Кондак 13

О великий угодниче Божий, и чудотворче святой блаженный Прокопие, услыши милостивно сие малое моление наше, в похвалу тебе приносимое, и умоли Господа и Спаса

нашего Иисуса Христа, избавити нас геенны огненныя и мучений вечных, и сподобити нас Небеснаго Царствия, да с тобою во веки воспоем Ему, яко Спасителю нашему: Аллилуиа.

Этот кондак читается трижды, затем икос 1-й и кондак 1-й

Молитва

О великий угодниче Божий и чудотворче, блаженный Прокопие! Тебе молимся и тебе просим: молися о нас ко Всемилостивому Богу и Спасу нашему Иисусу Христу, да пробавит милость свою к нам недостойным, и дарует нам вся, яже к животу и благочестию потребная: веры убо и любви преспеяние, благочестия умножение, мира утверждение, земли плодоносие, воздушное благорастворение, и во всем благом благое поспешение. Страждущую страну Российскую от лютых безбожников и власти их Господь да свободит, и да возставит престол православных правителей; верных рабов Его, в скорби и печали день и ночь вопиющих к нему, многоболезный вопль да услышит и да изведет от погибели живот наш. Стольный град, град твой Устюг, и вся грады и веси Российския, предстательством твоим

соблюди невредимы от всякаго зла. Всем православным христианом, тя молитвенно призывающым, комуждо по нуждам их, потребная даруй: болящым исцеление, скорбящым утешение, бедствующым поможение, унывающим ободрение, нищым снабдение, сирым призрение, всем же нам дух покаяния и страха Божия испроси, да благочестно скончавше временное сие житие, сподобимся благую христианскую кончину получитьи и Царствие Небесное со избранными Божиими наследовати. Ей, праведниче Божий! Не посрами упования нашего, еже на тя смиренно возлагаем, но буди нам помощник и заступник в жизни, в смерти и по смерти нашей: да твоим предстательством спасение улучивше, купно с тобою прославим Отца и Сына и Святаго Духа, и твое крепкое заступление о нас, во веки веков. Аминь.



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НОВОЕ
НЕБО**